

**Agrobank Rancang Keluar Pinjaman Hingga RM30 Juta Di Bawah Program Baharu Bernama
17 Ogos, 2011**

KUALA LUMPUR, 17 Ogos (Bernama) -- Agrobank merancang untuk mengeluarkan pinjaman berjumlah RM27 juta hingga RM30 juta tahun ini di bawah Program Pembangunan Keusahawanan (EEDP) Wilayah Ekonomi Pantai Timur (ECER), kata Ketua Pegawai Eksekutifnya, Wan Mohd Fadzmi Wan Othman.

Ia akan dilaksanakan dalam tiga hingga enam bulan akan datang, katanya kepada pemberita berikutan pemeteraian perjanjian antara bank itu dengan Majlis Pembangunan Wilayah Ekonomi Pantai Timur (ECERDC) di sini Selasa.

"Kami menjangka lebih daripada 200 permohonan bagi pinjaman PKS (Perusahaan Kecil dan Sederhana) dan pinjaman kredit mikro di bawah program ini," kata Wan Mohd Fadzmi.

Pada acara yang sama, ECERDC juga menandatangani perjanjian dengan SIRIM yang akan menyaksikan SIRIM memajukan dan melaksanakan projek-projek di bawah EEDP.

Menteri di Jabatan Perdana Menteri, Tan Sri Nor Mohamed Yakcop, menyaksikan upacara menandatangani perjanjian itu.

Agrobank akan menyediakan pinjaman PKS sebanyak RM50,000 hingga RM250,000 serta pinjaman kredit mikro berjumlah hingga RM50,000 kepada usahawan dengan tempoh maksimum 60 bulan dalam sektor-sektor utama ECER.

Agrobank akan menawarkan pinjaman kepada usahawan EEDP pada kadar faedah istimewa menggunakan mekanisme 'tokokan' oleh ECERDC.

Ketua Pegawai Eksekutif ECERDC, Datuk Jebasingam Issac John, berkata kira-kira RM10 juta telah diperuntuk oleh kerajaan bagi kegunaan di bawah mekanisme tokokan ini.

Beliau berkata kira-kira 200 usahawan dijangka mendapat manfaat daripada mekanisme ini dalam dua tahun.

-- BERNAMA

2011 Hakcipta BERNAMA

Source: <http://www.bernama.com/bernama/v5/bm/newsbusiness.php?id=608622>